

---

## LAMIJA HADŽIOSMANOVIĆ (1931.-2016.)

Devetog maja 2016. godine u Sarajevu je umrla dr. Lamija Hadžiosmanović, dugogodišnja profesorica Filozofskog fakulteta u Sarajevu.

Za Gazi Husrev-begovu biblioteku bila je vezana po više osnova. Kao profesor bibliotekarstva u više navrata angažirana je na stručnoj ispomoći prilikom ustrojavanja fondova Biblioteke na moderan, savremen način. Kao istraživač i zaljubljenik u našu kulturnu historiju bdjela je nad izvorima pohranjenim u Biblioteci, istražujući razne teme iz književnosti, bibliotekarstva, kulinarstva i drugih oblasti. U više saziva bila je član Savjeta Biblioteke, te član redakcije *Anal*a ove institucije.

Dr. Lamija Hadžiosmanović rođena je 4. 12. 1931. godine u Sarajevu. Nakon završenog Studija orijentalnih jezika sa historijom na Filozofskom fakultetu u Sarajevu 1957. godine, magistrirala je 1966. godine na Univerzitetu Ayni Šems u Kairu. Doktorsku disertaciju pod naslovom *Biblioteke u Bosni i Hercegovini za vrijeme austrougarske uprave 1878-1918. godine* odbranila je na Filozofskom fakultetu u Sarajevu 1977. godine. Na Filozofskom fakultetu provela je sav svoj radni vijek, prošavši izbornu proceduru za sva univerzitetska zvanja, od asistenta do redovnog profesora. Jedno vrijeme na ovom fakultetu radila je kao bibliotekarka na Odsjeku za orijentalnu filologiju. Poslije odlaska u penziju izabrana je za profesora emeritusa.

Bavila se proučavanjem bosanskohercegovačke književnosti na turskom jeziku, alhamijado-tekstova, bibliografijom, bibliotekarstvom, prevodenjem s turskog jezika književnih i naučnih djela iz starijeg vakt, kao i prevodenjem djela savremenih autora.

Prevela je djela jednoga broja bosanskohercegovačkih pjesnika na turski jezik. Pripredila je antologije pjesništva nastalog na ovim prostorima na turskom jeziku. Zajedno sa Salihom Trakom i Fehimom Nametkom pripredila je i za štampu pripremila Polimčev prijevod djela *Povijest Bosne* autora Saliha Sidkija Hadžihuseinovića Muvekkita. Djelo je štampano u izdanju Gazi Husrev-begove biblioteke 1999. godine.

Autorica je više naučnih i stručnih radova, studija i prikaza, kao što su: *Bibliografija prve muslimanske knjižare i štamparije Muhameda Bekira Kalajdžića*, *Biblioteke u Bosni i Hercegovini*, *Poezija Bošnjaka na orijentalnim jezicima*. Autorica je “Bosanskog kuhara”, jedne od najboljih studija iz oblasti kulinarstva.

Bila je član Izdavačkog savjeta preduzeća “Svjetlost”, član redakcije *Anal*a Gazi Husrev-begove biblioteke i Godišnjaka BZK “Preporod”, član Savjeta BZK “Preporod”, Član Vijeća Kongresa bošnjačkih intelektualaca,

član Savjeta Nacionalne i univerzitetske biblioteke, predsjednik Upravnog odbora Filozofskog fakulteta u Sarajevu, član Glavnog odbora Muslimanskog akademskoga kluba "Bosanka", član Bošnjačke akademije nauka i umjetnosti.

Učesnik je mnogobrojnih stručnih i naučnih skupova u zemlji i inostranstvu. Na naučnim skupovima koje je organizirala Biblioteka imala je zapažene referate koji su kasnije i objavljeni u *Analima* ove biblioteke.

U *Analima* Gazi Husrev-begove biblioteke objavila je četiri rada i to: "Jedna stara verzija (autograf?) Kaimijine kaside protiv duhana" knj. II-III (1974), str. 125-130; "Porijeklo mudžellitskog obrta u Bosni i Hercegovini", knj. XV-XVI (1990), str. 257-266; "Biblioteka i ulema", knj. XVII-XVIII (1996), str. 259-265 i "Uloga Bisera u kulturno-prosvjetnom uzdizanju Muslimana", knj. XIX-XX (2001), str. 237-242. Osim u *Analima* radove iz kulturne baštine objavljivala je u *Muallimu*, *Preporodu*, *Islamskoj misli*, *Kabesu*, *Glasniku Rijaseta Islamske zajednice*, *Gračaničkom glaniku*, *Bosniaci*. Aktivno je radila sve do smrti, a među posljednjim projektima koje je radila je studija o bosanskohercegovačkim turbetima i prijevod poezije Yunusa Emrea.

Umrla je u Sarajevu 9. maja 2016. godine u 85. godini života. Dženaza je klanjana u utorak 10. maja 2016. godine poslije podne namaza u haremu Gazi Gusrev-begove džamije, a ukop obavljen istog dana na mezarju Bare.

O. Lavić